



TAPAK 9

Sonia-i opposition
lenirtem ajurutsü



TAPAK 7

Aamir den shingai medemdangtsü
makoktsü: Shatrughan Sinha

VOL. XIV NO. 192 (ADOK 192)

DIMAPUR

TUESDAY

MAY 02, 2017

5.00

Nagaland CM aser Angh nati Moatsü salem abener

Dimapur, May 1 (TYO): Nagaland Chief Minister, Dr. Shürhodelie Liezietsu-i Aor ajak den Moatsü benjung salem metetdaksüogo.

Moatsü Mong ya metsü prokba sülen amunger aser iba benjung mapang nisungtem anibelega aruba sülen südoksünemtepa aser temang anisungzüka kazür, ta chief minister-i sangdong ka nung ashi.

Benjungmung mapang tzübu merüktetba aser kiojentem yangluba aser yanglushiba mapang asenoki asen loktiliba nung teraksa alibatem meyipa reprangdangtsüla, Dr. Shürhodelie-isa ayongzük.

“Pioneer district ka asünung, Naga loktiliba renloksü atema inyakba nung Aortemi shilem tulu agitsüla. Taküm Moatsü

benjung nung Angami Public Organisation (APO) ajanga Angami nunger jaokba atema kanga pelar. Tanü nenoki medemer metsü prokba ajanga, kin ana tsüngda dang masü saka Naga nunger kin ajak atema asüng süngjang tajung atangtsü,” ta Dr. Shürhodelie-isa metetdaksü.

Nagaland aser Arunachal Pradesh Angh, P.B Acharya-ia sangdong ka nung, Aor dangi Moatsü benjung salem metetdaksüogo.

Aluyimertemji 'annadata' (chiyungtsü agütsürtem) lir aser parnoki asenok atema meranga inyaker. Asenoki aluyimertem bilemtetdi aser parnoki meranga inyakba atema pelar ta shidi, ta Angh-isa ashi.

(Maneni tapak 11 nung...)

Byelection agira BJP-i takok angutsü: N Biren Singh

Imphal, May 1 (Agencies): Manipur nung taoba Congress MLA troki BJP nung adenba atema anti-defection law kübok parnok aitsütsü akok, saka BJP-i MLA 6 indang menden nung byelections agira parnokisa takok angutsü ta metetdaksü.

“Parnok (taoba Congress MLA tem) kibong nung denogo. Anti-defection law kübok parnok indang menden asoshi byelection agitsü tuyura, BJP-i parnok pusema yaritsü” ta chief minister, N Biren Singh-i ashi.

Manipur nung züngsem 60 agi akümba assembly nung Congress-i menden 28 nung takok angu saka tang parnok MLA 22 dang kümogo. Külen, BJP-i menden 21 nung dang

takok angu saka tang parnok MLA 28 jungogo.

BJP-i aniba teloktep sorkar nung MLA 38 lir aser parnok rongnung Naga People's Front aser National People's Party nungi MLA pezüzü, Lok Janshakti Party nungi MLA aser Independent MLA ka dena lir.

“Parnok ajaki pei pei constituency nung nübortem den asüngdangtepa sülen ang BJP nung aden. Vote agütsürtemi MLA tem aser BJP aginür, anungji parnoki byelection tsübua mali. MLA temi pei menden nung takok angutsü ta amanger. Iba denji, Manipur nung dang masü saka state balala nung BJP-i takok nguyonga arur” ta Biren Singh-isa shisem.

Mkg nung entrepreneur temi Dr. Shürhodelie den ajurutep



May 1, 2017 nü Commissioner's Guest House, Mokokchung nung Mokokchung Entrepreneurs Consortium (MEC) züngsemtemi Nagaland Chief Minister, Dr. Shürhodelie Liezietsu, Forest, Environment & Climate Change Minister, Imkong L Imchen aser PRO to CM, Pele Khezhi nung den külemi agiba noksa ka angur.

Dimapur, May 1 (TYO): Mokokchung Entrepreneurs Consortium (MEC)-i Chief Minister, Dr. Shürhodelie Liezietsu den ajurutepa Mokokchung district nung entrepreneurship renloksü dak sendakba onüktem lemsatop.

Dr. Shürhodelie-i asüng Aor den külemi Moatsü benjung amungtsü atema Mokokchung nung arua lir aser tanü MEC-i pa den ajurutep.

MEC chairman Tsukti Longkumer-i anir züngsem pungu agi akümba MEC teshimtet telok kati Chief Minister dang MEC-i

inyakba mapatem indang osang metetdaksü aser parnoki district nung entrepreneurship dak sendakba maparen inyaktsü bilembatem lemsatop.

Taoba mapang Nagaland sorkari MEC nungita yariba atema parnokisa Dr. Shürhodelie dang pelaba ashi.

MEC-isa Chief Minister dang 'La Catalyst' ta ser scheme tasen indang osang metetdaksü. Iba scheme ya MEC Micro Finance Initiative kübok tetsür entrepreneur tem ajungketsü atema inyaktsü, ta parnoki ashi.

Tanü MEC aser Chief Minister külem sendenji Commissioner's Guest House, Mokokchung nung amen aser iba mapang Forest, Environment & Climate Change Minister, Imkong L Imchen aser PRO to CM, Pele Khezhi na aden.

Iba senden nung Dr. Shürhodelie Liezietsu-i MEC indang annual Progress Report sayatsü. Asüng, Ao Senden-i Imkongmeren Sports Complex nung ayongzükba Moatsü benjungmung nung pa tongti tesemdang ama shilem agitsü.

Dr Benjongliba-i school ki tasen semzüktsü; Moatsü benjung nung aden

Dimapur, May 1 (TYO): Hombarnü CAWD & Taxes Parl Secy, Dr Benjongliba Aier-i Government High School Alongtaki nung school ki tasen ka semzüktsü.

Iba school ya India nüjiso mangudang, Alongtaki Upper Primary School ta ser 1945 nung lapok. Iba school nung mezüngbuba headmaster ji Dr Benjongliba tebu, asür JN Aier liasü.

Tanü kinungtsüi meina Dr Benjongliba-isa Lakhuni nung Moatsü benjungmung nung tongti

tesemdang ama shilem agi. Iba benjung nung Longsem dang, Changdang, Nokpu, Saring, Chungtiayimsem aser Yajang C nungi village council tem aden.

Dr Benjongliba-i o jembidang, "1945 nung mezüngbuba Upper Primary School lapoktsü atema tenlaba, yariba aser shilem agiba atema Japukung nung ajak tenüung nung Lakhuni yimer dang kanga pelar," ta ashi.

Paisa, tetsü-tebou mapang nungi tzükongsangertem

telongjem nung aruba meraksai tejakleni aotsü atema ayongzük.

“Nagaland nung tang NPF sorkar ya nübortem shimetba lir aser Centre-i senotsü lemzüka inyakyim melenshiba ajanga tayongzükbatem jenti ajuruaka, tajungtiba inyaktsü meranger,” ta paisa ashi.

Iba sentong nung Japukung Senso Senden aser Longsem dang, Changdang o Chungtiayimsem nungi Village council chairman temia o jembidi.

Mokokchung yimdak “Telungjem Terenlok” omen nung Moatsü benjong amung



Aosungkum Cultural Club Mokokchung Village ajanga yar tsüngsang ken (Inset) Er. Senti Jamir

Mokokchung, May 1 (TYO): Mokokchung yim Riongsanger Putu Mendeni Mokokchung yimdak Moatsü benjong tulu ka “telungjem terenlok” omen nung ajemdaker ayongzüka mungogo.

Sentong nung Moatsü ratet, Moatsü salem o den telok balalai

akhi Aor tetsü tebou yimya nung sobaliba sobusolem agir kenten menü aser yar tsüngsang tapu balala aiba ajanga benjongmungertem kanga longsotepa liasü.

Tanü iba sentong nung tongti o jembir SE, PWD, Er. L.Senti Jamiri omen nung ajemdaker

jembidang, “lokta ka lungjembaji kanga dang tashi tulu, telungjem den medemdangtsü tanga tashi kecha mali, telungjemi makoktsü kecha mali aser kong lokti telungjem lir yangji nüburtem sadok-sadoka nükjidong tongteta jangratema liteter”, ta ashi.

Paisa tanü Ao lima yimtsüng aika nung telungjem tashi maitdaksüba kuli kar lemsatopdang, “yimer rongnung lipoklisang aser jazükjakpong kanga bulua jembir, political party balala tsükchir ama liteper, item otsü aser yimyatem ajanga yimer tsüngda aser adianu tsüngda temeim mekongka kümdakja tesendaktep aser telungjem raksatsür”, ta ashi.

“Tesüiba otsü aser mapatem meteta alibaji junger saka asüng lanu putu asoshi tanü aseni yimli agütsüteper tangatetba nung lungjemer tarutsü nükla tajung ayutsü nüngdaker”, ta paisa ashi. “Aritepa aliba tensa ka nung shiri tesüiba otsü aser maparen indang dang teti jembir, item nübur aser loktiji tarutsü asoshi nükla tajung makatem asütsü”, ta paisa shisem.

Er. Senti Jamirisa lungjema alitsü asoshi teinyaktsü kar lemsatopdang, “tangar nem

telungjem asoshi inyakdaksünüba shisatsü masü saka aseni anir telungjem asoshi meranga inyaktsü tangatetba alitsüla, nisung shiai tzüzüng ozüng aser bangdak kübok tashi angatsüla aser senso rongnung kati ka akhümtsüba agütsüba ajanga telungjem tashi idaktsür”, ta ashi.

Lokti lenirtemi mapa ajak nung asüngteta ochi shia inyaktsüla kechiaser masüngtetba yimya ajanga nüburtem teimla samadoker aser “kong nübur teimla maka yangji nükjidong ajak chirepa telungjem samar”, ta paisa ashi.

Lokti tentet nung nübu shisatsü aser rongsen nüngdak, anungji, “pei akaba sempet agi lokti tenzüksüla, kati ka taoba ta yimli sayutepa, metongshitepa, tenüngsang tetushi agütsüba ajanga telungjem tali tashi ita kümdaktsür”, ta paisa shisem.

(Maneni tapak 11 nung...)

CHILDLINE Dmr-i Toulazouma nung Medical Camp ka katsüogo



Dimapur, May 01 (TYO): April 28 nü CHILDLINE Dimapur den Prodigals' Home & Mobile Medical Unit-i Chakhesang Baptist Church, Toulazouma village nung medical camp ka katsüogo. Iba sentong ya Hans foundation-i nungita liasü.

Iba camp nung tanur-tain 200 shi arua angati medical checkup den angati mozü agiogo.

Medical camp team nungji doctor asem- Dr. Beshashe, Dr. Vinishi aser Dr. Bendang nunger den nurse pezü, lab technician ka, pharmacist aser CHILDLINE Dimapur den Prodigals' Home &

Mobile Medical Unit naprong nungi züngsemtem liasü.

Iba camp katsüba atema Chakhesang Baptist Church Toulazouma Pastor, Velhuzo Swuro-i iba mapa tajung atema pelaba lemsatapa liasü. Paisa sarasadema iba camp tenzük.

CHILDLINE Dimapur City Coordinator-i lokti dang CHILDLINE-i inyakba mapatem aser service balala indang metetdaksü, iba sülen SAKHI OSC counselor, Kr. Inatoli-i SAKHI OSC indang presentation ka agütsü.

Kasa sentong nung lokti nem CHILDLINE aser RD Prodigals' Home indang osang aketba calendars, flyers aser pamphlets lemja liasü.

Iba sentong takok ngua katetba atema CHILDLINE Dimapur-i Chakhesang Baptist Church Toulazouma, CECS, Prodigals' Home, Doctor aser Nurse tem, DC aser District Inspection Team Dmu Chairman den külemi Martin Luther Christian University aser Christ University kaketshirtem dang pelaba lemsatap.

Transport Dept-i sangdonger

Dimapur, May 01 (TYO): March 29, 2017 nü Supreme Court-i obendang agütsüba nung ajemdaker Nagaland sorkar Transport Department-i, manufacture asür mesüra dealer temi Bharat Stage IV (BS-IV) küboki maitba tetsüing ana aketba, tetsüing asem aser pezü aketba garitem mesüra commercial garitem Nagaland nung April 01, 2017 nungi

mayoktsü metetdaksüogo. Iba den külemi Motor Vehicles Act, 1988 kübok vehicle registering authorities-i item ama gariji March 31, 2017 nü tashi nung mesüra iba jakdang aliba kuli sayutetba atema register sütsüba dak alaka item ama BS-IV emission standards maliba garitemji April 1, 2017 nungi register mesütsütsüla, ta metetdaksüogo.

May 9 nü Mkg DPDB senden amentsü

Mokokchung, May 01 (TYO): May ita atema ita shia amenba Mokokchung District Planning and Development Board senden May 7 nü masü saka May, 09, 2017 nü amentsü, aser iba sendenji anüngdang 11:00 ako nungi ADC Planning

Conference Hall nung amentsü, ta ketdangsertem sangdong ka nung metetdaksü.

Anungji DPDB züngsem ajaki anogo melenshibaji züngoka senden nung medema arua adentsü metetdaksür, ta sangdong nungsa shia lir.



Dimapur, May 01, 2017: Dimapur nung mapa mangur lanurtem atema Friends of the Poor Society (FPS)-i ayongzüka anogo 12 Basic Painting Course (BTC) agütsüba mapang nung tangokba noksa nung angur. Asian Paints aser Tata Trust den senteper ayongba anogo 12 nü training ya April 18, 2017 nü tenzuka liasü aser May 01, 2017 nü tembangogo. Iba sentong nung shilem agir parnok nisung 17 liasü aser parnok ajak temsüa Certified Painter kümogo. Iba training dak sendakba nung lanurtemi United North Block - B indang Council Hall nung rong tepja liasü. Friends of the Poor Society tentetsang aser Director ji Dr. Bendangjungshi lir.

Tanü Mkg nung shishilembaba tesemtem khen atema shibangtsü

Mokokchung, May 01 (TYO): Tanü MCCI Tir aser tongti tezülur nati külem sangdong ka ajanga, Ao Senden-i mepishiba ama, Moatsü benjungmung dak sendakba nung May 2, 2017 nü Mokokchung nung shishilembaba tesemtem khen

atema shibanga atatsü, ta metetdaksü.

Imkongmeren Sports Complex nung Ao Senden-i ayongzüka Moatsü benjungmung sentong aliba mapang dokan aser shishilembaba tesemtem khen atema shibanga atatsü, ajsüiaka

sentong tembangba sülenbo lapoktsü akok, ta metetdaksü.

Iba sentong nung tongti tesemdangeri Nagaland Chief Minister, Dr. Shurhozelie Liezietsu asütsü.

MCCI-isa Aoertem dang tepela Moatsü salem lemsataper, ta metetdaksü.

Ungma yimdak Young Naga Club-i ayonga Moatsü amung



May 01, 2017 nü Ungma yimdak Young Naga Club-i ayongzüka Moatsü benjong nung yar tsüngsang tetoktepba sentong nung club kati shilem agia yar tsüngsangba noksa nung angur.

Ungma (Mokokchung), May 01 (TYO): May 01, 2017 nü 43buba Young Naga Club-i ayongzüka Moatsü benjong den repsema yar tsüngsang tetoktepba sentong tajung ka Ungma yimdak Babu Tzübo Amphitheatre nung kaogo. Iba tetoktepba sentong nung Ungma yim kübok club ter (10)-i shilemagia liasü.

Sentong nung tongti tesemdang o jembidang IPR Parliamentary Secretary, Wb. Intikumzuk-i, tsüraburi benshiba sobaliba mamadoki wazüka ayutsü nükla nung Young Naga Club-i iba ama sentong tajung ayongzüka asoshi pelar, aser iba sentong ajanga Naga nunger dang tatishitsü tajung ka sayur, ta metetdaksü.

“Akhi asen tsüraburtemi benshiba sobaliba tajungtemji asenoki temlung agüja angazükba den asen yim ya sobaliba kentenmenü tsütsü nüngtugu kümdaksütsüla,” ta ashi.

Sobaliba angazükba den kaketshisatsü bushiba nunga kasa temlung agütsütsü asoshi paisa ayongzüka liasü.



Hombarnü Dimapur Nokpu Telongjem Dimapur-i Signal colony nung senso senyur kidang Moatsü benjung ayongzüka amungdang agiba noksa angur. (Dimapur, May 1, 2017)

Changtongya Sub-div dept co-ordination forum senden amen

Changtongya (Mokokchung), May 01 (TYO): April 28, 2017 nü Changtongya Sub-Divisional Departmental Coordination Forum senden SDO (C) Office Chamber nung menogo. Iba senden ya SDO (C) Chumlammo Humtsoe mendenbuba ser amen.

Iba senden nung züngsemtemi taoba senden nung telemtetbatem reprangshia liasü, iba den külemi April 24, 2017 nü mi lendong tatalokba nung takoksa angurtem nem SDDCF welfare fund nungi senotsü teyari agütsütsü atema lemteta liasü.

Senden nungsa Town Hall ji public sentongtem nung dang amshitsü lemtetogo.

Senden nung züngsemtemi tang aliba BDO Quarter nung security sepaitem lemkütsütsü atema lemtet.


Ano sorkar mapa inyaker ajaki SBI Mokokchung nung senotsü agizükdang timtem ajuruba dak sendakba nung Deputy Commissioner, Mokokchung dangi shidi ka zülutsü lemtetogo.

Ano senden nung züngsemtemi police point nung street light tsükloktsü atema Electrical Department nem mapa nungloktsü.

Mendenbuba-isa office ajak nung tekolakpurtem dang nüburtem tenzükba mapa nung pei teinyaktsü nendaka inyaktsü ajungshiba den külemi Officer In-charge danga jila nung police ajanga nüburtem nem security agütsütsü ajungshi.

Senden nung o talangka lemtetpa sülen Changtongya town nung Fire Brigade Station ka amenoktsü atema taruba DPDB (Mokokchung District Planning and Development Board) senden nung Mendenbuba ajanga benoktsü lemteta ayu.

Assam nung nashi auyaba ken o nung nisung ana zükset



Guwahati, May 1 (Agencies): Assam kübok Nagaon district nung nashi auyaba ken o nung temolung melemi lokti kati nisung ana zükset. Hombar anepdang tashi nung iba ken o dak sendakba nung nisung shinga pua mali.

Police ketdangser kati ashiba agi, asüsang ana ya arishi küm 20 nungi 25 tsüngda asütsü.

Police tem iba tesem adongdangbo, Nagaon police station Kasamari grazing reserve anasa aliba yimdaklir temi iba nisungba anadak kanga mejungi züka liasü, ta

Nagaon superintendent of police Debaraj Upadhyay-i osangbenertem dang ashi. "Police temi lanur anaji idangjisa mozüki anir ao, saka dena mozüki tonger süadok," ta paisa ashi.

Lokti-i lanur anaji kilometer 1.5 shi, Nagaon police station kübok Kasamari tesem nungi Jajori police station kübok aliba tesem tashi süng agi maneni züka arishi, ta pai shisem.

Upadhyay-i osangbenertem dang ashiba agi, asür kinungertemi item lokti anema police station nung ken o ka

benokogo aser police-i iba dak sendakba ken o bushisüngdang tenzükogo.

Iba ken o ya nashi dak sendakba asü masü ta asüngdang dang, pai ashiba agi, iba tesem nung nashi auyaba ken o kanga aika lir. "Iba dak sendakba ken o nung kü nem osang agütsüba agi, nisung kari tenadi alu nungi nashi bener aotsü merangya angu, anungji yimdak osang agüja nisung aika sentep. Iba sülen lokti jagi dena dak kanga mejungi azük," ta pai ashi.

Pai maneni iba ken o shinga pumesemi ochi nung büshisüngdangtsü tenanzükba agütsü.

Iba tatalokba ya Rajasthan kübok Alwar tesem nung arishi küm 55 tain ka nashi kümzükba ayutsü merangba nüburtemi tepsetba sülen atalok. Iba ken o ajanga Parliament nung mangatetep adokogo aser nashi kümzükba ayutsü merangba nüburtemnem tapet temerenshi agütsütsü asoshi akhang.

Doctor peria maliba atema CJAC longkak aitba manentsü

Aizawl, May 01 (Agencies): April 30 tashi nung Champhai District Hospital nung doctor peria agütsütsü asoshi Champhai Joint Action Committee (CJAC) ajanga Mizoram sorkar nem takhangba agüja aliba anogo süyiaka state sorkari mapa meinyakba ajanga JAC ajanga anu maneni longkak aittsü lemtetogo.

May 3 nungi tenzükba Mizoram-Myanmar arrtsü nung aliba Champhai jila nung sorkar indang office ajunga nung mapang telatet mükai mokdangtsü, saka iba mokdang nung kaket reju aser bank tem madentsü, ta JAC ajanga ashi.

May 1 aser 2 ya renemshiba anogo asütsü aser iba anogo nung nüburtemi chiyongtsü alitsü aser office mapatem inyaksü, ta iba senden nung lemtet.

Iba mokdang sentong yanglushitsü asoshi CJAC ajanga Champhai jila nung aliba lokti ajunga senden ka May 1

nung jazük. Champhai District Hospital nung doctor peria maliba ajanga Mizo Students' Federation-i anir Champhai jila nung April 18 nuntgi tenzükba longkak aiter. Iba longkak aitba sentong nung lokti tentet balala aser nübur ajungai shilem agia arutagi.

Mizo Students' Federation-i Champhai district headquarter nung longkak aitba mapang April 20 nung lendong tulu adoka Champhai

Deputy Commissioner office kima anena aliba sorkar meyong gari pezü aser nija gari ka rongdoktsü. Item longkak aitertem ya timba kaketshirtem liasü aser parnoki DC office nung long agi aonba mapang iba office indang kijisüba kar raksatsü.

Iba lendong nung longkak aiter aser police tsüngda mangatetep adoka tetsür ka densema kaketshir 15 yiru. Iba lendong atalokba sülen iba longkak aitba ya CJAC ajanga

animeso aser jila nung aliba lokti tentet ajungai shilem agia arur. Champhai District Hospital nung surgeon ka, paediatrician ka, pharmacist ka, 'jail doctor' ka aser medical officer ana meshia, CJAC-i takhangba agütsü.

Tang rongdak asoshi paediatrician ka aser general doctor ka April 30 tashi nung anir arutsü asoshi JAC ajanga state sorkar nem takhangba agütsü, saka sorkari iba mapa meinyaktetba ajanga sorkar office ajunga nung May 3 nungi tenzükba mapang telatet makai mokdangtsü asoshi CJAC senden nung lemtet.

State nung doctor peria maliba ajanga sorkari doctor tasen 26 shimtsü asoshi sentong tenzükogo. Iba shimba sentong ya Mizoram Public Service Commission (MPSC) ajanga agitsü lir, saka doctor tasen 26 ya taküm June ita tashi nung ang shimtsü akoktsü, ta MPSC ajanga ashi.

TENÜNGSANG ASER TETUSHI AGÜTSÜR



Wb. T. Imnuk Imchen aser Wt. Y. Temsuienla Longchar (Lirmen) na jala **Wt. I. Imnasenla Peter Vero-i** Philosophy in Journalism & Mass Communication nung Doctorate jenjang anguba takok asoshi la dang kanga pelar aser Tsüngrem tenüng asanger. La thesisji **"HIV & AIDS and violence against Women: A Study of the Role of Media in Nagaland"** liasü. Tarutsü nunga Tsüngremi la wadang aser lar kibong maneni moajang ta onoki sarasademtsür.

- Temeim kinungertem.

INSA Young Scientist sempet agütsütsü

Tezpur, May 01 (Agencies): Research category nung 'The Visitor's Award 2017' aser BIRAC-SRISTI Gandhian Young Technological Innovation (GYTI) Award 2017 agizükba sülen Tezpur University, Assam nung Department of Chemical Science indang tesayur, Dr. Sanjay Pratihari nem Indian National Science Academy (INSA) Medal for Young Scientist Award 2017 agütsütsü.

Dr. Pratihari-i 'Multi-metal complexes', 'theoretical understanding', 'selective sensing of Hq2+ions' aser aluyimba nung amshitsü oset

balala yangluba nung teyari aika agütsüba asoshi iba sempet ya pa nem agütsür.

Iba sempet ya December ita INSA benjungmong nung agütsütsü.

Indian National Science Academy ajanga 1974 küm tenzükba 'INSA Medal for Young Scientists' sempet ya küm shia India nung scientist teshimtet nem agütsür.

2012 küm July nung Dr. Pratihari-i 'DST-INSPIRE Faculty' sempet agizükba lir. Dr. Pratihari-i Indian Institute of Technology, Kharagpur nungi Organometallic Chemistry nung PhD agi.



Itanagar, May 1: Hombarnü Itanagar nung Arunachal Pradesh Governor P.B. Acharya (tabelen) lenisüba kübok Chief Minister Pema Khandu(tajichi) densema Raj Bhavan nung lokti dak sendakba tebilemstü ken o balala jembishinüba senden nung tangokba noksa nung angur.

Mizoram nung heroin lakh 8.50 alang apu

Aizawl, May 01 (Agencies): Mizoram Excise aser Narcotics Department nung ketdangsertemi sen lakh 8.50 alang herion grams 236 apu aser iba dak sendakba nung nisung ana apuba osang tanü ketdangsertemi metetdaksü. Excise & Narcotics department nung o tongdar Zohmingthanga-i ashiba agi, Champhai jila nung alir arishi küm 39 tain Hrangkapruma ket nungi

heroin gram 223 aser Champhai district kübok Mimbang nung C Rosangi (45) ket nungi Aizwal nung heroin gram 13 ta yashi nikongtsütsü puogo.

O tongdarisa ashiba agi, iba ozüng alema shibelenba mozü ya local shishilemba dak sen jenjang lakh 8.50 shi asütsü. Maneni Narcotic Drugs & Psychotropic Substances Act, 1985 kübok nisungba ana aitsüogo, ta paisa ashi.



Guwahat, May 1 : CITU aser AITUC züngsemtem International Day anogomung nungtem nung yimti yimdong süa jaja dang tangokba noksa nung angur.

Tripura nung Chief Electoral Officer tasen shim

Agartala, May 1 (Agencies): Election Commission ajanga government Principal Secretary Sriram Taranikanti state nung Chief Electoral Officer (CEO) asütsü asoshi shimogo, ta ketdangser kati Hombarnü metetdaksü.

1992 batch IAS officer ka lir aser pai Transport, Food, Civil Suppliers aser Consumer Affairs department achaayanga liasü.

Centre sorkar atema lemozüktsüsang S.K. Rakesh ji Taranikanti melena liasü. Taranikanti ya Tripura cadre

Ketdangser kati ashiba agi, pa lenisüba kübok taruba election agitsü. Menden 60 atema election Tripura nung taruba küm February ita Nagaland aser Meghalaya den külemi agitsü.



TIR YIMYIM

YIMOBILEM (EDITORIAL)

DIMAPUR TUESDAY, MAY 02, 2017

Nisung ajak tongtimbang

Mongdangmongji aser lokti senden nung dang masü saka kiyir benjong aser Arogo jubilee mapang nung dena tamendak menden aser chiyongdak tesem nung tongtimbang nisung (VIP) amendak balaka shimteta yutsüba sobaliba ya asenok asoshi awashi metetba sobaliba tajung ka ama benschia aruogo. Ibaji dang masü saka yimsüsür aser ketdangser amenba gari kolaktem nung light temerem pereta senzüba ajanga parnokji tongtimbang nisung (VIP) mesüra kanga tular (VVIP) ta shisanga metetdakja senzüba asenoki nguogo. Item mapatem jagi alima nung tilar o tular na bendanger, anungji kasa meimchirsa süaka telok ana küma lemsar, tilartemi tulartem tenzüker aser tulartemi tilartem mezügmeshir ta aliba lima ka nung asenok talangka liogo. Ajisüaka, tang Narendra Modii aniba Centre government-i iba ama tular shisanga senzüba aser benschiba sobaliba anendaktsüogo aser tang nungibo nisung kar mejeteta tongtimbang nisung mesüra kanga tongtimbang nisung ta lokti nung lemsaa züngshiba sobaliba malitsü metetdaktsüogo. Aji oda, Narendra Modi-i ashiba ama, tang nungibo linük nung nisung kar mejeteta 'Very Important Person' (VIP) malitsü saka ajak tongtimbang nisung asütsü, anungji VIP melen EPI (Every Person is Important) alitsü ta metetdaktsübaji yimsüsür aser tulartem kübok nübortem tsübuseta tarakzüka sadema marakzüktet aliba tia nungi nüjiso angur amai asütsü. Atangji, linük nung VIP sobaliba aliba ajanga nübortemi shimteta yimsüsür aser nübortem tenzüksü asoshi shimteta ketdangser tulartemang nisung ama aser nübortemjibo shiruru jenjang nung ali ama maparen aika nung tenzüksü melen mezügmeshiba ajangshia aruogo. Aji oda, tular asünungji tetsung agibo tatsükata mejajatsü, bodyguard medenibo tenla kidangia maotsü aser escort mendenibo office-ia maotsü ta yimsüsür aser tulartem aika peisasa pei dang nungi tuluba amato bilema ngasangatema pongmang lima nung alir ama aliba nguogo. Yimsüsür aser tular asünungji lenmang temesü nung süaka tangar ajak ajateta karaa aotsü. Iba amaji siren ola agüja nübortem dak motzü seplokja aser auyi ponglokja parnok ajateta moura yimsüsür aser tular memesük ama asenoki bilemba shisatsü ka asenok dak liadokogo. Ibayongji, yimsüsür aser tulartem sademsadema süidaktsütsü asoshi kanga kodamasü tasür shiranger abenba ambulance gari asüyonga anena atatsü. Ashiko, yimsüsürtem karibo kitsükirong lendong nungi nübortem kümzüksü asoshi ooya aliba fire brigade gari dena soittsüa akok. Aji oda, asenok yimsüsür aser tular akümba yimyaji metetmeteta nübortem tenük agi mangur aser nübortemia parnokji tsüngrem ama tsübur, kechiyong nübortem kolok nung alar ama bilemetsüsa tekolok aser tangatetba enokja lir. Aji oda, asen lima nungbo yimsüsür aser tulartemi pei amenba gari kolak nung light temerem meinok senzüsübaji lapir lapir bilemetsüa akok, kechiyong iba tangatetba aser sobaliba nung arur talangka. Iba jagi gari kolak nung light temerem agizüka ayubaji yimsüsüba aser ketdangsuba menden nungi atsüzüka yutsü amai bilemetsüa akok. Ajisüaka, VIP sobaliba benschiba ajanga nübortem tenzüksü shim ser nung nübortem nem tenzükdaktsür. Iba jagi aiben nübortemi par tenzüker mesüra par kilir majurutetter. Aji oda, VIP sobaliba benschiba ajanga kilirtembo anisüngzüka jangratema alir aser kiburtem, aji nübortem, -bo timatemer. Nisungtem rongnung yamaji karbo kanga tongtimbang aser karbo tongtimbang masü ta bendanga amshiba ajanga külemi longjemer pei lima asoshi meinyaktetter. Aji oda, taküm piyong kiburiang kilirji kanga tongtimbang nisung ta bilema akümtsübuba ajanga kilirtem kanga asüküma kümer lia, iba asüküm menden nungi ali tashi alur nübortem den külemi lia alu mapaa inyaktsü aser terenlok mapatema reprangtsü ta inyak tenzüksüba anogo tasen ka adokogo. Atangji, ibai India tasenba yangluba mapang lir. India tasen küma yangludang maparen karbo asenok dak mapetba mapa aser yimsüyimping bener arutsüa akok. Ajisüaka, India tasenba ka yanglutsü asoshi ngasangatema aliba menden nungi ajemalua alur nübortem den jenjang ka nung külemi lia tenzüksü apusoba sentong nungjibo Naga nunger yimsüsür aser tulartem tama asütsüla. Ibajiang shitakba Khristan yimsüi sayuba inyakyim aser sobaliba asütsü.

OLEMSABANG

Benjong Lima (Land Of Festivals)

- P. Renthly Jamir

(Yashi adok nungi...)

Temoatsü meshizükba Tsüngremi moatsüba tenüngsang agütsüba aser aji aluyimertemi ali nungi züsentet nungang akatsü. Hon ali nungi tuteter merang yin oset ajak ali nungi agiteta yanglur. Ali(earth) kobai nüngdaka inyakba pur ajak peridaktsür aser meromeroa ambangyimer chidiyungdir anojungi taküm tembangtsür. Akidang middle Age mapang 1675 küm Italy monk Augustine aser Charlmagne nunger mapang putirtemi anir alima ya Tsüngrem yimti aser onsara jangratemtsüka ta mapa meinyaki pelatepa ken tena among. Divine worship nungji nübur asoshi kecha meinyaktet. Saka St. Bernard monk atar pa tesayubaji 'hard work is a part of a monk Holy Calling' ta tamanger ajak mapa meranga inyaktsü ajungshitep. Solomonia ashi, menüshishi agi benjungji yanglur aser yi agi takümü peladaktsür aser ajak asoshi sen lalur. Sayu-10-19.

Naga lima 'Land of Festivals' nungja jateter asen Aortema lanurtemi tsürabur sobaliba raksaja Moatsü Tsüngremmong mungteper. Kechiyong yashi tashi tanü ama item benjung meshimetsüa mamung. Tongti tesemdanger sen lakh ka, Tetushi tejaoker sen lakh ka VIP temi pei yari Donation ajakji shi yi nung endoktsü. Asen tsüraburtembo Pauli II Tesa 3.10 nung ashiba ama, azümasener nembo tsüktem magütsü, alu nübua mani. Ano world History reprangdangra, England nüchiso Roman nungeri agütsü, America nunger England nunger den nüchiso rara rarar angu. Aser item Nuchiso rarar tayimoktsüba "No Taxation without Representation" ta-ang zülua lir. Saka nübur züklem kilen mazü percentage kangatepa saruteper nüchiso meshizük tabo mangur.

Land of Festivals asünung NBCC-i anir arogoi missionary sayutsüngir atema agüjang aser Minister MLA National Workers atema sarasademjang ta-ang ayimoktsür. Anungji tular yimsüsürtemi sensaker tilar maochi parnok indang sanction ajak kinangsepa malangtemtsür. Tang yangi tawa atalokba tatishitsü tilatiba ka bener arudi : 2003 küm PWD department tulartemi Work Charge aser Labourtem nem 'No Work No Pay' ta sür September, October, November ita sen magütsü sota ayu. Saka tilartemi aji maremteti Court nung Case atep. Tang putu ka tesadang küm 15 buba nung iba senji agüjang ta Courti obendang agütsü. Iba mapang labour pay sen 750 liasü. Anungji ita asem sen 2250 angutsü tim. Saka parnok nem sen 1450 agutsü labour shia sen 800 mait, ano Work charge ita sen tila nung parnok sen 2000 katizük. Süra iba senji Bar Association-i sübokrem meshi asü ? Chief Engineerbai lokti kar nem agütsü asü ? Mesüra Engineer SDO temi Moatsü atema agütsü (?) ta nübur ratateper. Anungji, iba nung ya NSCN temi kechi ashir (?) mesüra ACAUT telok toa station nung mali asü mesüra NSF aser AKM-i koda shidanger ? Tang iba tatishitsü bena aruba lanurtemi 'Land of Festivals' nung tongti tesemdanger tetushi tejaokertemi sen lakh lakh agütsüba ya par senpong nungi agiteta agütsür ama bilemer saka ya asenok ajak meyong agütsür. Aser teimba yamala tilar sen auyaba agütsür. Anungji asen tsürabur sobaliba nung aliba ama Moatsü aser Tsüngremmong nung Ao Senso Telongjem Dimapur-i tentetba ama, Chief guest mejaoki meranga inyakba nungi bendener pelateptsü aser mezüngbuba MAPA MULUNGSENTSÜ tanabuba nungang BENJUNG MULUNGSENTSÜ AYONGZÜKER.

Iba Olemsabang nung lemsaba ken-o aser shisatsü ya iba ocet zülur-i bilemba ken-o ama tazünger-i angateta agitsü mepishir

ISIS ya Laishiba nung Amalekite nung den kasa lir



Jerusalem, May 1 (Agencies): "Anitet tapu nung tongpang indang shia lir, iba tongpang ya Yihuda nung den tsükchia arur Amalek aser Israel tsüngda liasü aser Egyptian desert nung Rephidim ta ajaba tesem nung rara" ta Breaking Israel News-i metetdaksü.

"Iba tongpang atalokba sülen küm meyirjang ana lir, kasa tesem nung tang Israel'er tsükchirtem anema tongpang ka ajuruogo. Iba tesem ya Bir Gafgafa nung Egyptian airfield ka lir aser ibaji Laishiba nung shia aliba Sinai Peninsula nung Rephidim tesem lir" ta BIN-isa ashi.

Israeli military intelligence website Debka Files yimozülur, Giora Shamis-i iba tongpang aser tesem indang bushitet aser pai ashiba agi, Islamic State anema rara nung Egypt ji Israel den yariteper ka lir, ta BIN-i metetdaksü.

Tawa Egypt nung IS-i Coptic

Khristantem kanga bulua amaker aser Palm Sunday nü Alexandria o Tanta nung tenlakitem amakdang Khristan 45 tashi asü.

Shamis-i BIN den sensaksem dang ashiba agi, Laishiba nung IS-i tanü rara tulu ayongba indang shia lir.

"Ni tamangtir ka masü, saka ISIS aser Amalek mesüktepbaji tejangja aser tanü-astüing tensaji medem dangtsüla. Küm 2000 tejakdang atalokba, tanüa kasaji ataloker" ta Shamis-isa shisem. Ano külen, Arutz Sheva nung taoba ketdangser Shai Ben Tekoa-ia, "ISIS ya Amalekite nung tanaben asoba lir, Laishiba nung parnokji Yihuda nung anemertem ta shia lir" ta ashi.

"Amalek nung ama ISIS-ia taochi melii inyaksangshir" ta Ben Tekoa-ia shisem.

"Laishibaji atangji lir aser tanü alimai ajangshibatem angatetsü atema iba nung ajak

zülua lir" ta paisa metetdaksü.

United States nung arogo lennirtemi IS ya Laishiba nung shin-a aliba ama atalokba lir ta ashir aser parnok rongnung Harvest Ministries nung Pastor Greg Laurie dena lir.

December 2014 nung "Israel, Iran, ISIS in Bible Prophecy" ta ser onük jembidang, Laurie-i, "Laishiba nung tatem anogo atongdang, alima nung mangatettep tamajung nungi tamajungtiba akümtsü ta shia lir" ta metetdakja liasü.

"The ISIS Crisis: What You Really Need to Know" kaket zülurtem Dr. Charles Dyer aser Pastor Mark Tobey natia, "IS ji Laishiba nung shinzüka aliba den meputep ta kuli ngutetaka, iba ya ajanga Tatembang Anogotem ajurutsüsa maparen tenzükdaksütsü" ta shia lir.

"ISIS ya samatsü akok, saka iba sülen tashitaitba aser tamajungba telok ka adoktsü. Ainkar Ezekiel-i teloktep telok kati Israel amaktsü mapang ajurutsü ta shia lir. Middle East nung ano tanga army ka küni anogo adoktsü" ta Dr. Charles Dyer aser Pastor Mark Tobey natia metetdaksü.

"Parnoki ISIS indang wako tanak amer marutsü, saka parnok indang tangatetbajibo tamajung aser teraksa bener arutsütsü atema dang asütsü" ta tenatisa shisem.

ANO GO ABEN TSÜNGREM DEN

SEMPET:

TSÜNGREM TAOCHI AJANGA

"Aser asenok nem agütsüba taochi yari sempet balala asünung, ainkar sempet süra, asenoki tamang yari ainkar o jembiang" - Rom 12:6

Tsüngremi asenok ajak nem sempet balala agüjaa lir. Alima aser Tanela sempettem süshia, Pai asenok nem balala agüja lir. Item sempet ajak ya kechi koma aru ta süra, Tsüngrem taochi ajanga lir. Mapang ka nung, alima aser meimchir ajak tammang tia nung temeneni mokbanger liasü saka Tsüngremi, asenok oda meim nung Pa ajaso chir alimai yok. Yisu Khristai alima aser meimchir nem Pa ain tesangwa bener aru aser shi aser tanela raksaa-alibatem ajak aneptsü, temenen tashi nungi nüchi agütsü.

Atangji, Tsüngremi asenok nem koba sempet agüja lir, Yisu Khrista azü tokshiba taochi aser temeim nung ajemdaker asenok Tsüngrem kuli sür ka ka lidi.

T.Ken 105:1-2, "O Kibuba dang tepela sayuang aser pa tenüing nung jaang, Nübur rongnung pa mapatem metetdakjang Pa dang ken tenang pa dang tenüingsang tenang: Pa sayatenya mapa ajak indang shiang"

SARASADEM:

Kibuba ! Nü tashi tanela temeim sempet asoshi Nü tenüing asanger. Amen

Morocco nung Khristan temi sadoksadoka amangnür

Agadir, May 1 (Agencies): Morocco nung nisungtemi müima Khristan yimsü agizükba sülen tang parnoki odia amangtsü atema takhangba agütsür.

Morocco nung sorkar indang yimsüji Islam lir aser tamangba yimsü toktsütsü ozüing memelar.

Arishi küm 46 tain civil servant Mustapha ya Islamic law nung mongin ka lir aser pa yak hen mapang kabo Islamist Charity aser Justice movement nung züngsem ka liasü.

Paisa ashiba agi, pa 1994 küm Khristan yimsü dangi meyip.

"Kü tanela nung tazüing aliba süngdaksütsü atema ni Islam toktsür Khristan yimsü agizük. Ni Islam nung onük aika meputepi aliba lakadok" ta Mustapha-ia ashi.

"1980s tatemlen nungi Spain nung aliba religious centre ka den ni tongtepratepa aru aser ibaji ajanga ni Khristan yimsü kanga jangra aküm" ta paisa shisem.

Pa Protestant pastor ka inyaksüsa azüing aser correspondence course ka ajanga United States nungi kulikaket angu.

Mustapha-i küm 20 tashi pa indang tamangba yimsü miimbanga ayu aser küm ka ser tesadang jakdang pai online nung video ka sayuba nung pa tamangba yimsü meyipa indang yimjak nung metetdaksü.

"Kinünger aser medemertemi ni toktsü. Ni mapa nungia anendaksü. Ozü tanurtem school nung tiluja amshi" ta Mustapha-isa metetdaksü.

Taküm Easter mapang Mustapha aser Khristan kar Rachid ta ser nisung kar kidang adenshia sarasadem mapang agi. Mustapha ama Rachid-ia pa tenüing ajunga memetetdaksü.

Rachid ya 2004 küm Islam toktsür Khristan yimsü agizük aser pa-a Protestant pastor ka aküm.

Rachid-ia ashiba agi, pai Paris nung amenoka aliba radio station ka anga, cyber-cafe ka nung Christianity indang osang metettsü merang, specialised website ka den tongtepratep aser parnoki pa nem Laishiba ka bener yok.

"Ni Laishiba ajunga azüing, course kar agi aser arishi küm 24 asüdang Casablanca nung ki ka nung ni tzüsen" ta paisa shisem.

Taküm April ita Mustapha, Rachid aser tanga Moroccan Khristantemi National Council of Human Rights (CNDH) dangi parnok reshikangshiba anenang ta mepishia shidi ka zülu.

"Onok chirnur nem Khristan tenüngtem jatsütsü, tenlakitem nung sarasademtsü, Khristan leperitem nung mang aremstü aser onok tamangba yimsü yimya nung kiyimba sentong agitsü atema akhanger" ta Mustapha-ia ashi.

Islam ya Morocco linük indang tamangba yimsü lir saka 2011 nung Linük Temzüng tera yanglushiba nung tamangba yimsü koba amangnür amangtetsü atema temeten agütsür.

Iba jagi bendanger Khristan temibo yimjak nung tamangba yimsü amanger.

GRAMMY 6 ben angur Amy Grant Music City Walk of Fame nung züngok



(Abelen nungi): John Huie, Amy Grant, Bart Millard aser Nashville Mayor Megan Barry

Nashville, Tenn. May 1 (Agencies): Trokben tashi Nashville philanthropist & businesswoman Martha R. Ingram-i Amy Grant züngsemba mapang agi.

Amy Grant-i kententsü tenzüker küm 30 dak tema arur aser lai mezüing gospel music nung tera ayang aser iba sülen la pop star, songwriter, television personality aser philanthropist aküm.

Bart Millard nati la meina liasü. Nashville philanthropist & businesswoman Martha R. Ingram-i Amy Grant züngsemba mapang agi.

Amy Grant-i kententsü tenzüker küm 30 dak tema arur aser lai mezüing gospel music nung tera ayang aser iba sülen la pop star, songwriter, television personality aser philanthropist aküm.

Amy-i multi-platinum albums 3, platinum albums 6 aser gold albums 4 tashi ngutetogo aser

la indang kenseptem ajanga sen million 30 den tema yokzükogo.

Amy-i GRAMMY sempet 6 anguba dak alia, lai Dove Awards 26 (Artist of the Year Awards pezü densema) angu aser Hollywood Walk of Fame nung petinu ka anguba den Music City Walk of Fame nung züngok.

Taküm April ita Amy Grant-i "Baby Baby" ken mejema tener küm 25 buba ajungba benjung amung.


OLONG PAITEP # 4409

1			2		3				4	
							5			
6		7								
				8		9		10		
	11									
12										13
					14					
				15			16			
17										
							18			

TIPILEN		LANGTSÜNGLEN	
1. Mali	(4)	1. Aon nangdaksüba	(5)
5. Tebilemba züluba	(4)	2. Alima toktsür ao	(3)
6. Ochishir masü	(7)	3. Tekolok meshitak	(4)
10. Maneni	(3)	4. Tekolak o temang na tetsungda	(6)
11. Shisadang	(9)	7. Kidang alir	(5)
12. Aso	(3)	8. Jang asepa oset	(3)
15. Chi kenshiba oset	(7)	9. Nü dang tambu	(3)
17. Saklok	(4)	10. Talangka mepila	(5)
18. Ya kanga tako	(4)	11. Aoksa	(6)
		13. Sü atakba lisü	(5)
		14. Tsüngremi sayu	(4)
		16. Teka agi amet	(3)

OLONG PAITEP # 4408 TELANGZÜBA

TIPILEN :		LANGTSÜNGLEN :	
2. Yimten, 6. Aisü, 7. Jahaz, 8. Shin,		1. Injang, 2. Yehova, 3. Mezüng,	
13. Meim, 15. Suyim, 16. Aiür,		4. Nashi, 5. Rür, 9. Kümsük, 10. Tzüyim,	
17. Asüküm.		11. Teimla, 12. Yimra, 14. San.	



ALOKBA ANOGOSHIA SCHOOL-I KANGA MENURSA ARUBA AGI, SCHOOL HEAD TEACHER-I JAA ASÜNGDANGER

Hi, Mr. Alok, kechiba na yamai schooli menursa arur?? Yamai aru nungbo asüng nungi school nungi aridoktsü!!!

Ma'am, yamaji kodang masütsü, asenok school kima nung tanemi dang jajang ta zülua lir iba jagi ni melungi jaja arur.

Lilir : ISK, Dimapur

TANÜBO NAI LANGZÜANG

- Q. UN General Assembly nung tetsür Tir mezüngbulaji shiba liasü?
- 1) Aruna Asif Ali
 - 2) Vijaya Lakshmi Pandit
 - 3) Sarojini Naidu
 - 4) Virginia Woolf

(Taruba adok nung onoki langzüksü)
YASHIADOK TELANGZÜBA : Jagat Prakash Nadda

Happy Birthday

TENUNG. : NUNGTOKMAREN JMR,
 Tasoba anogo : 2 May
 Kum : 3
 Talidak : Ungma village
 Salem osang-Teyanglur Tsüngremi jabaso Nungtokmeren küm asem tashi arishi moatsü nung pa Tenüng asanger. Ano maneni anema aliba den arishi talang moajang ta sarasademtsür.
Temiem oba,oja,odi,Otsü,opo & kinungertem



NAIA YA METETER MA MERILA ARISHI



Merila teintet kaji anogo ishika mesüra ita ishika taküm alir aser ibaji merila tapu balala (species) dak tuluka ket lir. Merila karbo meyi nungang taküm alir aser kodang tsüngküm tongdir süadoker, ajisüaka parnok indang entsütemji tsüngküm nunga meraksai/mesüi alir aser meyi mapang ayalokdang rüteter. Ano merila tain karbo tsüngküm nung atsükoka/amoia oa (hibernate) atar anungji item merilatemji küm ka nungi tanabuba küm tashi ayaloka taküm liteter. Tsüngküm mapang entsü ama aliba merilatemji meyi ayaloklii rütetba sülen hopta ana nung tain akümer. Merila tepongtemi naro tzü mesüra ibala mesükba chiyungtsü chia taküm alir, kechiba süra parnoki merila tetsü ama temang nung teyari angutsü asoshi azü ajemtsü menüngdaker. Merila tepongtembo tetsütem dak entsü koloka yutsürbo hopta ka shi dang taküm lir süadoker. Ajisüaka merila tetsütembo talanglang alir. Parnok ita ka nungi ana tashi arishi alir, saka tasütsü mapang matongdang parnok shiruru tilatemi achir, yipru mopung agi tepseter mesüra parnok tebok nung entsü renlokdaoktsütsü asoshi nisung dak azü ajem dang maseter.

SUDOKU # 3522

TELANGZÜBA # 3521

			6	4		8	2	7	8	3	6	1	2	5	4	9
8				3		4	1	2	1	9	4	5	3	6	7	8
9						6	5	5	6	4	9	7	8	3	2	1
3	7	5	8	1	9			1	5	7	8	9	6	4	3	2
	8		3	4	7			6	9	2	7	3	4	1	8	5
4	1						3	4	3	8	5	2	1	9	6	7
			2					3	7	1	2	4	9	8	5	6
	6	8		3	4			9	2	6	3	8	5	7	1	4
7	5					2	9	8	4	5	1	6	7	2	9	3

OJANG LUTEP # 4014

- GATANRI : □□□□□□□
- YAKINER : □□□□□□□
- IBALA : □□□□□
- APMA : □□□□
- NNUG : □□□□
- SHAMUIBA : □□□□□□□□
- AJA : □□□□□
- TKSERAA : □□□□□□□
- ALTI : □□□□
- OKADER : □□□□□□

OJANG LUTEP TELANGZÜBA # 4013

TATIDANG BALALA AJAK KOKTETSÜSA TSÜNGREMI ASENOK NEM TASHI AGÜJA LIR

Anü ita petinu ajanga alima nung tsüngsang mopung melenshidaksüba ama nisunger tia-a melenshidaksür ta anü ita petinu tetzürtemi ashir, parnoki ashibaji shidak asü tai'ar nai-a na asoba ita anogo den tanü nü tia medemdangang (Horoscope):

- Aries** 21/3-19/4: Jembishinüba nung mebilemdangi shilem agira timtem ajurutsü. Anungji na kümzüka alitsüsa jembiang aser na tajangzük angutsüsa inyakang.
- Taurus** 20/4-20/5: Tanü nai mapa meranga inyaktsü bilemtesü aser iba ajanga nai o aika mejembitsü. Tangari nü mapa nung timtem magütsütsüsa inyakang.
- Gemini** 21/5-20/6: Na lokti nisung aser nai lokti yimya kanga junga meteta lir. Saka nisung aikati na meteta aliba ama nü mapa nung aibelenbaji aikati meteter ta angatetang.
- Cancer** 21/6-22/7: Na nür kinungertem den tesendaktep kanga junga linür. Anungji nü mapa inyakdak ama nür kinungertemji tebilem aser mangatettep madokdaksütsü merangang.
- Leo** 23/7-22/8: Nai nisung tai dang o tai ashiba ajanga timtem ajurutsü südi. Saka tanü nai item timtem metsüboi na kechi inyaktsüar inyakang.
- Virgo** 23/8-22/9: Züngzünga inyaktsü mapa aika ajuruba ajanga nai kisüng dang mapatem inyaker aser iba yongji nai azüngmeyaka bilemer. Medemertem den sensaksem liang.
- Libra** 23/9-22/10: Nisung kati ka meinprongba ajanga mangatettep adoktsü saka item bendangtsü asoshi nai memerangtsüla. Nü jakdang aliba mapatem koktetsü meranga inyakang.
- Scorpio** 23/10-21/11: Nai tanü anibelem mesasai medemertem den sensaksem akatsüla. Aser nai o kumdanga mejembiba ajanga na aiben lendongi ayir ta angatetang.
- Sagittarius** 22/11-21/12: Na azüngmeyaka aliba ajanga ochi dang jembir. Ochi o jembibaji tajung saka iba ajanga nisung aika temolung yirutsür ta meteta kumdanga jembiang.
- Capricorn** 22/12-19/1: Nü dang temaba jenjang nung alirtem den kumdanga jembishinüang. Inyakeri dang aibelener, anungji terenlok alitsü asoshi metsübui inyakang.
- Aquarius** 20/1-18/2: Nai jembiba o agi na aiben lendongi ayir, aser tanü nai aji kanga junga ajangshitsü südi. Jembishinü nung masü saka zülupanglu nung temolung agüjang.
- Pisces** 19/2-20/3: Nai tangar junga angatetang aser nai timtem majurutsü. Mangatettep adoka aliba nisungtem kar nai yariang aser kechi ajanga timtem adokdaksür, aji nai sayuang.

Aamir den shingai medemdangtsü makoktsü: Shatrughan Sinha

New Delhi, May 1 (Agencies): Actor aser politician Shatrughan Sinha-i ashiba agi, Aamir Khan-i shilem agiba film tem ya nüburttem atema tatishitsü aketba film tem kumogo.

"Aamir-i film tem nung kanga junga shilem agir aser pa ajak ajungmesor ka kumogo," ta Asha Parekh: The Hit Girl kaket sayaba mapang Shatrughan-i ashi. Asha Parekh indang kaket 'The Hit Girl' ya Khaled Mohamed den yaritepa zülü aser Om Books International-i publish sütsü.

Arishi kum 71 tain actor-i



ashiba agi, Aamir ya Bollywood nung dang masü saka 'art' aser 'culture' sector nunga ajaki meteta lir.

"Aamir den medemdangtsü asoshi shinga mali ta bilemer. Dangal film

nung ama tetsürtem ajungkettsü atema inyakba maparen balala ajanga lokti molungjang aser linük ajunga kongshiogo... Ni amanger iba amala film tang tashi nung kata yanglua mali aser tarutsü nunga meyanglutettsü südi." Ta pai shisem.

Shatrughan-isa ashiba Aamir-i nisung aika ajungmesor aser pa mapa tang ang tenzüker.

Aamri taruba film 'Thugs Of Hindostan' nung shilem agitsü asoshi renemshidar aser iba film nung Amitabh Bachchan den külemi shilem agitsü.

Alima nung nung tambutisang Indonesia nung süogo



May 1, 2017 (Agencies): Arishi kum 146 tain Alima nung tabutisang Indonesia nung 'Central Java' nung par yimdak süogo.

Pa küli kaktetem ajanga ashiba agi, 'Sodimedjo' shiba dang 'Mbah Ghoto' taa ajar pa 1870 kum December ita aso.

Aji saka Indonesia nung-er 1900 kum nungiang nisung asobatem züludena ayutsü tenzüker aser tanga mapang nunga iba dak sendakba nung aibelena aruogo.

Ketdangsaertemi ashiba agi, pa küli kakettem aser pa den

sensaksemba nung ajemdaker pa kum ya shitak ta jangjaba osang benertem dang metetdaksü.

Pa April 12 nü temanga tashimeiti akümba ajanga mozüki nung anepalutsü asoshi anir ao saka anogo 6 dang lir pai kidangi aotsü asoshi rongshiba ajanga pa anir oadaok.

"Pa mozüki nungi meyipa aruba sülen nungi anogo nung sotsü terara dang ayong aser tzüa tera dang jema liasü. Iba sülen anogo isheka dang lir külen nungibo pa masü tashi kecha

mechi-i liasü, kechiyong pai chiyongtsü achitsü asoshi nongnanga liasü." ta par semchir Suyanto-i osang benertem dang ashi.

Yaküm kum osang benertemi pa den sensaksemba pa arishia aliba tasa ya kechi ta asüngdang dang pa miemba nuburtemi anepaluba ajanga lir, ta langzü.

Akümlü tepeyong pa moko kanga chia liasü aser kinungtsü 4 tashi, adianu 10 aser pa jala jabaso ajak dang nungi pa arishi talangba ali.

Pai 'Japan' aser 'Dutch colonisers' den raraba indang otsü ashiba ajanga par yimdak pa kanga nungtugu liasü.

Par semchir Suryanto-i ashiba agi, tebu Hombarnü pai kum isheka tejakdang alia aliba lokti aremdak leper nung remtsüogo.

"Pai aika memeshi. Pa masü tsüngda par kinungertem nem pa joko odaktsütsü asoshi dang shia liasü," ta semchiri shisem.

Pa kum kanga junga asadagra Ghoto ya France tsür Jeanne Calment dang nungi talangba alisang asütsü. Jeanne ya arishi kum 122 asüdang asü aser tang tashi nung alima nung talangtiba alila ta züngshir.



Zurich, April 1: Switzerland, Zurich nung May Day demonstration mapang Longkak aiter kati 'clown' ama renemer motorbike nung mener aliba Swiss police officer ka nem anüshi apongtsüba noksa nung angur.


TAN HOPTA ATEMA - KOMA SÜLA ?

Q. Govt office ajak nung anogo shia biometric system amshia tenüng aja nunga koma süla ?

Olong 20 shi nung May 05, 2017 tashi nung iba telangzüba ya onok dangi

e-mail - tiryimiyim@gmail.com mesüra SMS - 9856121232 / 9436072422 mesüra Tir Yimiyim Facebook account ajanga yokang. Telangzübatemji taruba Hokolbar nü adoktsütsü.

Daytime Emmy Award nung Ellen DeGeneres nungeri takok angu



May 1, 2017 (Agencies): 44buba Annual Daytime Emmy Awards sentong Deobarnü Pasadena Civic Auditorium nung agiogo. Iba sentong ya Mario Lopez aser Sheryl Underwood na lenisüba kübok agia liasü.

ABC indang sentong "Good Morning America"-i 'Best Morning Program' sempet ngua liasü, aser iba sempet ya ajak rongnungi tongtibangba ka lir. Ellen DeGeneres show-i 'Best Entertainment Talk Show' sempet angu.

Iba sentong nung CBS-i sempet 7 aser ABC-i sempet 5 angu. "General Hospital" show ajanga sempet 4, "The Young and the Restless"-i 3 aser "The Bold and the Beautiful"-i 2 angu.

Iba sentong ya Facebook nung live sayu aser nisung 29,000-i repranga liasü.

44buba Daytime Emmy Award takok anurtem yamai alitsü:

- * OUTSTANDING MORNING PROGRAM - "Good Morning America" (ABC)
- * OUTSTANDING ENTERTAINMENT TALK SHOW HOSTS - "The Talk" (CBS)
- * OUTSTANDING SUPPORTING ACTOR IN A DRAMA SERIES - Steve Burton, "The Young and the Restless" (CBS)
- * OUTSTANDING SUPPORTING ACTRESS IN A DRAMA SERIES- Kate Mansi, "Days of Our Lives" (NBC)
- * OUTSTANDING YOUNGER ACTOR IN A DRAMA SERIES - Bryan Craig, "General Hospital" (ABC)
- * OUTSTANDING YOUNGER ACTRESS IN A DRAMA SERIES- Lexi Ainsworth, "General Hospital" (ABC)
- * OUTSTANDING GAME SHOW - "Jeopardy"
- * OUTSTANDING INFORMATIVE TALK SHOW - "The Dr. Oz Show" (SYNDICATED)
- * OUTSTANDING INFORMATIVE TALK SHOW HOST - Steve Harvey (SYNDICATED)
- * OUTSTANDING ENTERTAINMENT TALK SHOW - "The Ellen DeGeneres Show" (SYNDICATED)
- * OUTSTANDING GAME SHOW HOST - Steve Harvey, "Family Feud" (SYNDICATED)
- * OUTSTANDING ENTERTAINMENT NEWS PROGRAM- "Entertainment Tonight" (CBS)
- * OUTSTANDING DRAMA SERIES - "General Hospital" (ABC)
- * OUTSTANDING LEAD ACTOR IN A DRAMA SERIES -Scott Clifton, "The Bold and the Beautiful" (CBS) -
- * OUTSTANDING LEAD ACTRESS IN A DRAMA SERIES - Gina Tognoni, "The Young and the Restless" (CBS)
- * OUTSTANDING CULINARY PROGRAM -Eat the World with Emeril

Mesayai aliba TV show tem Hacker temi auyar lemsa

May 01, 2017 (Agencies): Hacker temi TV show 'Orange is the New Black' indang 'episode' 10 meyima agizüker sayatsü. US nung media company, Netflix dang sen meshiba magütsüba sülen iba mapa ya inyak südi, ta nüburtemi bilemer.

Iba show ya June 9 nungi tenzüka sayatsü liasü.

ABC, Fox aser National Geographic tem nungia 'series' aika auyatetogo, ta hacker temi ashi.

"TV studio tulutemi amshiba production company indang

'security' temai adoktsüogo aser ozüng amshirtemi bushisügang tenzüko," ta Netflix ajanga osangkaket ka nung ashi.

Iba hack asürtemi 'The Dark Overlord' tenüng nung auya aser parnoki mozüki tem nung tenük yoker, ta osang ka ajanga ashi.

Sen magütsübayong Netflix amokmerena Pastebin website nung item hacker ajanga April 29 nung osang kar sangdong.

Saka sen ya kwi meshiar anu mejangjai lir.

Item hacker temi tanga

show aser film 37 auyaba kuli sayur, ta Computer security osang agütsüba telok, Databreaches.net ajanga ashir.

Item auya aliba show rongnung 'XXX: Return of Xander Cage', 'It's Always Sunny in Philadelphia' aser 'Bill Nye Saves the World' indang Season 1 tena lir.

"Iba auyaba ajanga tanga telok aser auortemia kasa mapa inyaksü jangratsü," ta US nung aliba Chapman University nung Economics professor, Brett Danaher-i osangkaket ka nung shia lir.



Mojiang, May 01: Southwest China nung Yunnan Province kübok Mojiang tesem nung May 1 nü jakreptem benjungmong nung atentsü asoshi arudang jakreptem tangokba noksa nung angur. Iba tesem nung aliba aser tanga tesemtem nung jakreptem sendena Mojiang tesem nung küm shia jakretem benjungmong ya anogo asem amonger. China nung aliba Mojiang County nung jakrep 1,000 dak tali lir aser iba yongji Mojiang dang ya "Jakrep linük ta ajar.

Sachin Tendulkar indang SRT.Phone May 3 nü sayatsü

May 1, 2017 (Agencies): Smartron ya Indian IoT company ka lir. Iba company ajanga 2016 küm 't.phone' ka yanglua liasü. Iba smartphone ji kanga tajung liasü saka jenjang tasak rongnung züngsema liasü. 2017 küm iba company ajanga May 3 nü jenjang kangabo tasak masüba phone ka sayatsü asoshi renema lir.

Iba phone dang ya srt phone ta ajar. 'Srt' ya tatsü agi Sachin Ramesh Tendulkar ta ajarba lir. Iba phone ya India nung mezüngbuba design sür yangluba phone ka lir. Smartron ya danga Indian brand tem aika ama 'Shenzhen shopper company' ka masü.

Iba phone ya sen 15,000 certified phone asütsü. Maneni iba jenjang nung aliba tanga

phone dang nungi SAR value tajemba asütsü imlar.

srt.phone nung ya 5.5-inch full HD display, Quickcharge 2.0 dena 3000 mAh battery aser Qualcomm Snapdragon SoC keta alitsü imlar. Maneni company ajanga phone tesülen cover melentettsüsa talila ka agütsütsü imlar. Phone cover nung Sachin Tendulkar indang signature densema alitsü.

Phone nung Android 7.0 operating system keta lir aser iba den külemi tesülen camera 13 megapixel aser tejaklen camera 5 megapixel ta alitsü. Iba phone ya maneni 32 GB aser 64 GB variant nung angutsü imlar.

India nung sen 15,000 tekübok nung ayokba phone Motorola, Honor aser Xiaomi nung den srt phone jenjang kasa nung alitsü imlar.

Porsche Cayenne gari-i tayimtsü ka atsür ao, otsü tasen yanglutet



Paris, May 01 (Agencies): Porsche GB technician, Richard Payne-i aniba gari, Cayenne ajanga Paris Charles de Gaulle Airport nung tayimtsü ka metre 42 atsür ao aser iba ajanga 'Guinness World Record' tasen yangluogo. Iba otsü tasen ya gari kati tayimtsü taretiba atsür aoba lir. Iba tayimtsü ya Cayenne dang tonne 115 agi taretba liasü.

Iba sentong asoshi Air France ajanga A380 tayimtsü agütsü aser tayimtsü anenzüka yanglushiba ki (hangar) ka amshitsü mela. Iba tayimtsü anena yanglushiba ki tasazük ya square metre 60,000 lir aser Cayenne gari 3,000 anena yutettsü. Porsche Cayenne tasazük metre 4.8 lir aser iba gari ya Airbus A380, tasazük metre 73 den sendaktep.

Iba Guinness World Record ya Cayenne S Diesel gari ajanga yanglua liasü aser Porsche Cayenne Turbo S ajanga yanglushi. Cayenne S Diesel gari ajanga horsepower 385 aser 850 Nm torque agütsür.

"Onoki koktetogo. Ni temolung süngzükogo. Onoki yangluba gari tendangtsü asoshi iba ama mapa ya meinyakdang saka tanü takok ngua tendangogo. Iba mapa ya kanga tasak lir saka Cayenne-i kicha

mashishie takok ngua atsür otetogo. Kü indang gari tanüandangtsü sünga Airbus dang angu aser aji kanga jangratemtsüka liasü. Customer temi imlaba dang nungi tashi tali iba gari ajanga agütsür. Iba gari ya London nungi bener aru aser A380 atsür otetogo. Stuttgart nung iba gari yanglurtem dang kanga pelar aser Air France-i tebur tajung tayimtsü atsüdaaktsütsü melaba atema kanga pelar," ta Porsche GB nung technician, Richard Payne-i ashi.

"Porsche ama Air France Industries KLM Engineering & Maintenance ajanga mapa meranga inyaker aser tayimtsü tajung yanglutsü meranger. Charles de Gaulle nung Porsche ajanga otsü tasen yanglutetba ya onok asoshi konang lir. Iba mapa ajanga AFI KLM E&M nem tesayuba tasen ka agütsüogo. Iba takok asoshi Porsche den tepela lemsateper," ta Air France Industries nung Executive Vice President, Gery Mortreux-i ashi.

"Otsü tasen yangluba aika ni tendangogo saka Porsche Cayenne ajanga alima nung tayimtsü tulu rongnung ka atsür oa yanglutetba otsü ya kanga tesüngmangtsü lir," ta Guinness World Records nung Adjudicator, Pravin Patil-i ashi.



New Delhi, May 01, 2017: Hombarnü New Delhi nung aliba Hyderabad House nung Ato kilonser, Narendra Modi-i Turkey Tir, Recep Tayyip Erdogan den salemba noksa nung angur.

Kiralongra prokterem anema alima linüktemi longjemer inyaktsüla: Modi

New Delhi, May 01 (Agencies): Hombarnü Ato kilonser, Narendra Modi aser Turkey Tir, Recep Tayyip Erdogan na senden mena linük ana tsüngda security aser shishilembaba densema lenla balala nung tesendaktep jenjang repringhia liasü, iba den külemi regional aser International onüktem nunga arok tangatetba lemsatepa liasü, ta osang ka ajanga metetdaksü.

Kasa senden nung kiralongra anemba aser regional security nunga amalitepa inyakba jenjang repringhia o lempogoo.

Iba senden tembangba sülen osangbenertem senden nung külemi jembidang Ato kilonser, Modi-i, "Loktiliba nung anogoshia amokmeren tasen aser tayongzükba tasen aika

ajuruba putu ka nung asenok lidar. Alima nung security tayongzükbatem ya arok tebilemtsü ka lir. Talisa, kiralongra ajanga amokmerenba atema asenoki tebilemtsü lemsateper. Ni iba onük nung Turkey Tir den senden menogo aser iba senden nung kiralongra anema raratsü künati bangjemogo," ta metetdaksü.

Ato kilonserisa, alima linüktemi külemi longjemer kiralongrartem networks aser parnok dangi senotsü aruba lenmangtem raksatsütsü aser arrtsü alema kiralongrartem senzüba nokdangtsüla, ta ashi.

"Alima linüktemisa kiralongra adokdaksürtem, pusemertem, tejenokdak agütsürtem aser prokterem anema inyaktsüla," ta paisa ashi.

"United Nations Security Council (UNSC)-i taoba aso masü saka tang 21buba aso nung alima tensa repringshitsü nungdak ta künati bangjemogo. India aser Turkey nüburtem akhidang nungi sobaliba aser oshiooben nung tesendaktep lir," ta paisa metetdaksü.

Ano külen Turkey Tir, Erdogan-ia, kiralongra anema raraba nung par linüki India teti nungittsü, ta metetdaksü.

"Kiralongrartemji parnoki tokshiba azü nung arakseta asütsü," ta paisa ashi.

Turkey Tir yashi India tonga arua, aser tanü pa Rashtrapati Bhavan nung agizüka liasü. Iba sülen pai Raj Ghat semdanga Mahatma Gandhi nem akhüm agütsü.

Erdogan Tir akümba sülen tang mezüing pai bendang linük semdangar.

Raratsü atema India renema dang lir: Subramanian Swamy

New Delhi, May 01 (Agencies): Pakistan Army tongti, General Qamar Javed Bajwa-i Kashmir onük nung jembiba o meyipja Hombarnü Bharatiya Janata Party (BJP) lenir, Subramanian Swamy-i, Pakistan-i tiyongtsüi aita jangjongra parnok den raratsü atema India-i maongka bushidar, ta amokmeren.

"Parnok nem merangdakjang, onok renema lir, onoki meyiptsütsü, aser iba

jagi Pakistan tatembang kati arutsü. Pakistan samatsütsü atema India meimer ajak renema lir," ta Swamy-i osangbenertem dang ashi.

Swamy-isa, Islamabad-i komaka merangdir merangaka parnoki kodanga Kashmir ji nungi mepiladaksütettsü, ta ashi.

"Pakistan-i India den pezüben tashi raraogo aser ajak nungji parnoki tamakok angu. Parnoki jembiba oji ni

mesükshir, kechiyong iba linük indangji onoki meteta lir, yangji sorkar mali. Parnoki kechi inyaknüdir inyaktsü akok, aser iba atemaji onoki atadar," ta BJP lenirisa ashi.

Deobarnü Pakistan army tongti, Bajwa-i, par linüki Kashmir nungeri yimtenren atema rarabaji maneni nungittsü, ta ashi.

Paisa, India-i Kashmir nung kiralongra nungiter, ta aija liasü.

Sonia-i opposition lenirtem ajurutsü

New Delhi, April 30 (Agencies): July ita nung Tir election agütsü lia opposition party tem longjemer candidate ka shimtsü dak sendakba nung Congress Tir, Sonia Gandhi-i NDA nung madenba party tem ajurua senden amentsü, ta osang angazüker.

Sonia-i May ita tomlen tashi nung opposition party balala nungi lenirtem den senden amentsü aser state party temi nungita sentong kar renemtsü.

Opposition party tem longjemer candidate ka shimtsü sentong dak sendakba nung Sonia Gandhi-i Trinamool Congress tongti aser West Bengal Chief Minister, Mamata Banerjee dena jembitsü aser BJD, AIADMK den Shiv Sena lenirtem ayongsemtsü atema CPI(M) lenir Sitaram Yechury, Congress lenir, Ghulam Nabi Azad aser JD(U) lenir Sharad Pawar nunger nem mapa lemzüksütsü.

"Kobi melii tezüngzüktep ka agütsü imlar," ta JD(U) otongdar, K C Tyagi-i yashi ashi.

Tawa BJP-i UP assembly election nung takok tulu nguaka Electoral College nung parnoki vote tesadanga matonger. Tang teinyakdak Tir, Pranab Mukherjee kümsük July 25 nü tembanger, aser iba anogo matongdangsa Tir shimtsü.

BJP-i Tir shimtsü atema

sentong yangluba jangjaba sülen Bihar Chief Minister, Nitish Kumar (JD-U), Sitaram Yechury (CPI-M) aser D Raja (Communist Party of India) nungeri taoba hopta mapang balala nung Congrese Tir, Sonia ajurua senden menogo.

Tir shimtsü atema Electoral College nung BJP-i ano vote 21,000 shi nungdaker, anungji BJP-i aniba NDA sorkari AIADMK mesüra BJD party tem teyari nungdaksü.

March ita nung BJP den teloktep nung dena aliba party, Shiv Sena-i, India Tir tasenba atema Rashtriya Swayamsevak Sangh (RSS) tongti Mohan Bhagwat shimtsüa akok, ta metetdakja liasü.

Iba mapang nung Shiv Sena-i, "Hindu Rashtra" (Hindu linük) nükjidong ataloknüra Bhagwat Tir kümdaksütsüla, ta ashi.

Ajisüaka Bhagwat-ibo, ni Tir menden nung amentsü mejangrar, ta shiogo. May ita tom sülen socialist lenir, Madhu Limaye sor küm 95 ajungba anogomung sentong nung

opposition lenirtem sabang ka nung ajuruteptsü, aser iba senden nung Sharad Yadav, Digvijaya Singh, Sitaram Yechury, D P Tripathi, Atul Kumar Anjaan, Kamal Morarka aser Kunwar Danish Ali nunger densema opposition lenir aika adentsü.



Maharashtra state jenjang anguba anogo, May 01, 2017 nü Kolhapur nung Revenue & PWD Minister, Chandrakant Patil-i school tanurtem nem nanglong lemstüba noksa nung angur.

International Labour Day nung Narendra Modi-i tetushi agütsü

New Delhi, May 01 (Agencies): International Worker's Day mesüra May Day ta ajaba, International Labour Day tanü mungogo; international labour associations ajungkettsü aser ajungshitsü atema iba anogo ya kümshia amunger.

Iba anogomung nung Ato kilonser, Narendra Modi-i twitter ajanga, "Tanü Labour Day anogomung nung India terenlok atema shilem tulu agia kanga meranga inyaker mezüingdaktetba nisungtem nem onoki tetushi agütsür. Shrameva Jayate!" ta lemsatep.

Iba anogomung nungsa,

alima ajaklen mapa inyakertemi rongsenkettsüing ajungkettsüba nung shilem agiba atema parnok nem tetushi agüja amunger.

Tanü New Delhi nunga Labour & Employment Minister, Bandaru Dattatreya leniba nung International Labour Day sentong ka agiogo.

Iba anogo nungsa Trade Union Organisation balala aikati aayangertem jenjang ajungkettsütsü nükjidong nung sentong balala ayonga akar.

Tanü iba anogomung nung linük tesem balala nung lokti senden, symposiums aser seminar sentong balala ayongzüka kaogo.



Jammu, May 01, 2017: Hombarnü Jammu nung International Labor Day anogomung nung Centre of Indian Trade Unions (CITU) züngsemtemi yimiyim ayima longkak aitba noksa nung angur.



Mosul, Iraq anuolentip tsütsü Iraq Federal Police tem aser Islamic State telungpur na raraba noksa ka yangi angur. (May 1, 2017)

Kim Jong-un-i US aircraft carrier samatsütsü amokmeren

Seoul, May, 01 (Agencies) : North Korea nunger lenir Kim Jong-un-i, America navy indang tzi telung nung jajaba rong, USS Michigan, North Korea tzi leni arura samatsütsü, ta amokmerenogo.

Nuclear tashi keta aliba tzi telung nung jajaba rong, USS Michigan ji tang South Korea kübok Busan yimti nung aliba navy tesep nung anena lia USS Carl Vinson aircraft carrier teloka arua densemogo, ta osangkakettem nung shia lir.

Pyongyang-i, USS Michigan ji tera danga arakzitsü merang nungbo, tzi telung nung lua tanela ka mesüka akümtsü, ta sangdongogo.

"Korea peninsula nung ajungbena nuclear rong anenbaji 'super aircraft carrier strike' yokba mapa den tenchiteper aser

ano military temi maneni onok nemteblemtsü agütsür," ta North Korea website ajanga metetdaksü.

Pyongyang-isa, USS Carl Vinson-a North Korea anasa tera danga arura tzi telungi ludaksütsü. ta shiogo.

"Nuclear aircraft carrier mesüra tzi telung nung jajaba nuclear rong süaka itemji ozü military tashi ajanga nuclear nokdangba inyakim agi merang tejep ka dang kümdaksütsü," ta kasa website ajanga ashi.

North Korea aser US na tsüngda tesendaktep mejungi akümba sülen iba ama tashi toktepba mapa inyakteper. Hokolbarnü missile tendangba nung tamakok anguba sülen ano Kim Jong-un-i missile ka danga tendang nungbo odang medoktsütsü, ta US Tir Donald

Trump-i shia liasü.

Trump-i pa military inyakim aser tasa kanga miimshia ayur, ajisüaka pai, ni aniba administration-i Kim tashi mait kümdaksütsü, ta ashi.

"Iba mapa ya Clinton, Bush aser Obama nunger mapang inyakatoker alitsüla," ta pai ashi.

Pyongyang-i missile aser nuclear tendangba anendaksütsü asoshi China Tir, Xi Jinping dak temulung kanga lema aliba mapang North Korea-i ano ballistic missile ka tendangtsü merangbaji China mezüngmeshiba mapa lir, ta US Tir-i ashi.

North Korea dang tashi sayua US-i Korea peninsula tzi leni USS Carl Vinson yok aser iba rongji Honibarnü Nagasaki, Japan ajanga North Korea leni aoba nguogo.

Afghanistan:US-i amakdang telungpur 9 asü

Kabul, May 01 (Agencies) : Nangarhar province, Afghanistan nung US drone ka agi gari ka oyaa aliba dak missile khaloktsüdang tajemba agi Islamic State telungpur 8 asü, ta Hombarnü ketdangsertemi ashi.

"US-i Deobarnü anüng nungi amakdang gari ka anüka

poksatsü," ta ketdangsertemi ashiba osangbenertemi metetdaksü.

2015 küm Islamic State telok tentetba mapang nungi shir tang tashi nung Jalalabad yimti yimtiba sür aliba iba tenem province nung security force tem aser Islamic State rarartem tsüngdang kanga

rara adoker.

April 13, 2017 nü Afghanistan nung aliba US force temi Achin district kübok IS telungpur indang longpok ki ka nung bomb tesashi ka pokloktsüdang IS telungpur nisung 100 shi tepset aser iba mapang IS atsükokba tesem ka meshimeshia samatsü.



United States nung yipru tesashi kar (tornadoes) aruba sülen April 30, 2017 nü Canton, US nung nisungtemi yipru agi raksatsüba ki ka nungi oset agizükba noksa nung angur. Honibar aonung U.S. kübok Texa state nung item yipru jagi tajemba agi nisung pungu taküm samatsü aser 49 yirutsü.

EU memelenshira 'Frexit' ajurutsü: Macron

Paris, May 01 (Agencies) : Nüburtem tang ya kanga Tan France Tir election nung far-right party nungi candidate, Marine Le Pen dang nungi shilem 20 agi jenjang tajungba alisang, independent party nungi candidate Macron ya Europeon Union (EU) meimer aser pusema nungiter nisung tejangja ka lir.

Ajisüaka taruba Deobarnü linük Tir election shilem tanabuba agitsü lia Macron-i, Brussels nung inyakim shitak masüba ajanga France dak kongshir, ta tuteta ashi.

"Ni EU nungiter nisung ka lir, ni election nübuyim mapang nunga EU tebilemba aser inyakimtem wazüka aser kümzüka yua liasü kechiba süra EU ji France asoshi kanga tongtibang," ta pai osangbenertem dang ashi.

"Ajisüaka tensa den chiteptsü nungdak aser nüburtemi ashiba angatsüla.

meipelar aser koda mesüi kümogo. EU-i teinyaktsü tim meinyakba ajanga item ya ataloker," ta paisa ashi.

May 7, 2017 nü Marine Le Pen-i election nung takok ngua Tir aküm nungbo lai France ya EU nungi atsüngtsü. Anungji European Union aser asen European project asüngsashitsü nungdak, ta Macron-i ashi.

Brussels-i tang ama yasa inyak nungbo asenok ashioktsütsü. Ni yamaji mesüdaksüner. Kechiba süra asüng yanü asenoki 'Frexit' ajurutsü, ta pai shisem.

Le Pen-i EU nung adentsü madentsüji vote ajanga lemtetsü metetdaksüogo aser iba den külemi immigration tsütsü temelenshi tesashi ka agitsü shiogo.

Lai tang tashi nung yimtsüngtem nungi vote timba nguteta lir.

US rongtem den yariteptsü, Japan-i raraba rong yok



Tokyo, May, 01, 2017 : Khen nung helicopter pungu tashi oli aruli südaksütetba, Japan indang Self Defence Forces' destructor rong, Izumo noksa yangi angur. US nunger raraba rongtem nem totzü aser nungdakba osettem agüja meina aotsü asoshi Japan-i iba rong yok.

Tokyo, May 01 (Agencies) : Washington aser Pyongyang na tsüngda tensa mejungi kümer aliba mapang ka nung Hombarnü Japan-i parnok indang raradang amshiba rong tulutiba rongnung ka US rongtem yaritsü asoshi yokogo.

Japan indang Self Defence Forces' destructor rong, Izumo nungi khen nung helicopter pungu tashi oli aruli südaksüteter aser iba rong ya Tokyo anuolentip tsütsü Yokosuka navy tesep nungi Pacific leni ayamesogo, ta osangbenertemi ashi.

19,500-tonne taret rong yagi ita asem tashi jajatsü aliba US supply rong Shikoku asetkong tashi meina aotsü. Iba mission ya küm 70 nung mezüng takok anguba mission ka asütsü.

Izumo-i US rong nungittsü. Iba rong yagi US rong nem totzü aser tanga nungdakbatem ajak agütsüba den nuclear tashi agi amshiba aircraft carrier, USS Carl Vinson aser amakdang amshiba rong telok tem den

yariteptsü. Pyongyang-i missile maneni tendangba ajanga aser parnoki ano nuclear trokbuba tendangtsü tsümba bilemba agi Washington-i Korea Peninsula leni parnok indang raraba rongtem yok.

Pyongyang-i tan tesüsa Honibarnü missile ka tendangogo aser iba kasa anogo nung US carrier-a Sea of Japan tonga Japan aser South Korea na den military drill agia liasü.

1945 küm World War II anenba sülen teloktep linük ka yaritsü asoshi Japan-i tan rong, Izumo yokbaji mezüngbuba asütsü.

Iba inyakim ajanga Japan temzüng kübok arrla 9 nem tetetzü tasen ka agütsür. Linük nung Ato Kilonser Shinzo Abe-i anir lokteper inyakba mapa pusemer aser par sepaitemi tebielmba tajung aketba tanga linük sepaitem yaritsü janrar.

Tesüiba mapang nungbo Japan security ji pei tesemi lendong arudang nokdangtsü atema dang inyakaba telok liasü.

Nagaland CM ...

(TAPAK 1 NUNGI...)

Centre aser State sorkartemi aluyimertem atema soil testing, Kisan credit card, National Food Security Mission amala sentongtem atonga inyaker. Anungji, asenoki aluyimertem dang item welfare projects indang osang metetdaksüdi aser parnok ajangzüksü atema item teyari agitsü ajungmesodi, ta P.B Acharya-isa shisem.

"Ni aser kü kinungsü Kavita Acharya nati Aor ajak den iba benjung mapang salem abener. Moatsü benjung ajanga Aor aser talisa Naga nunger nem yimjung, telongjem aser azükaru bener arujang ta moatsür" ta paisa metetdaksü.

KIBONG KUMER KÜM 50 AJUNGBA TENÜNGSANG



02/05/1967 to 02/05/2017

Tsürabur **BENDANGLEMZUNG** aser **MATONGTULA** (Changtongya), temeim aser Ochi nung alima wadang tensa ajak ajangteta arur tanübo jogo kibong kumer küm 50 jungogo, nena akhüm nung chirnur aser semchir jenti moaja onok den taküm tajung doktsü nung Tsüngrem tenüng asanger.

Maneni nena akhüm nung chirnur aser semchir- semnurtem ajak temoatsü nung lia otettsüsa arishi talang moajang ta sarasademer.

- Temeim Chirnur, Semchir, anük-apang aser amolatem.

Molungnen O



1-08-1942 to 18-04-2017

"Ni taküm aliyonga mesura süadokiyonga ni Tsüngrem meiyong"

Onoki kodanga amatsü makokba Obala Asür

Pangerkumzük Tzüdir (Yimjenkimong) teti menürema pela-a dang aliba tebu, ariabilem aser temeim akaba tetemjen tebu obala liasü, taremsük aser tashi angaba mulungso taküm.

Tanü na onok nungi pilar akümüli wadang tempanga teti tatem makaba limai Tebu Tsüngremi 18-04-2017 anogo nung jar oaka onoki Obala temeim kodanga mamatsü.

Obala shirangba anogo nungi pa tasüba anogo tashi kija, kibong, kiyonger, lokti palala aser talisa Doctors, Nurses & staff Zion Hospital, Dimapur onok dang meima nübo, rongsen, shisatsü aser sarasadem agi yariogo, nenok ajak dang kangasa pelar. Nenok temeim mapa onok molung nung teti asoshi ayur aser tulusang Tsüngremi nenok ajak talubosa moajang ta sarasademtsür.

Temeim kinungsü, Chirnurtem, Semchirtem, Anükapang aser kinunger

C-Edge College

College of Arts & Management

Naga United (4th Mile)
Dimapur - 797112 | Nagaland |
Ph: 03862 - 242728
email: c.edge.college@gmail.com
www.cedgecollege.org

ADMISSION NOTICE FOR BA & BBA

BA (Gen/Honours)	BBA
English Sociology History Economics Political Science CBCP in English Communication Skills	Specialisation in Financial Management Marketing Human Resource Management CBCP in Entrepreneurship Development. INDUSTRIAL TRAINING

INITIATIVE FOR YOUR PERSONAL GROWTH

Public Speaking | Leadership | Job Interviews Training | Language Skills

Limited in-campus hostel seats for both boys and girls.

Mokokchung yimdak...

(TAPAK 1 NUNGI...)



Mokokchung senso bendangaliri amen ken atenba yangi noksa nung angur, (Mokokchung Yim, May 1, 2017)

Paisa terenlok tsütsü onük kar ashidang, terenlok asoshi mezüngbuba meraji rongsenkettsüung nung nisung shiai tangar dak memetaloki pei peribo meranga inyaktetba alitsü, saka tia maka India lima nung Centre dak metaloker alir state-tem rongnung Naga nungerji tematiba jenjang (92.5%) nung lir, ta kuli kar metetdaksü. "tangar dak metaloker alirtemi kodanga renloka pi den toktepa moutettsü", ta paisa shisem.

Paisa renloka aotsü asoshi teinyaksü kar lemsatepdang, "kija shiai pei kibong nungdak

peribo meranga inyaksüla kechiyong maka mait aser azümesen ajanga aiben ochi mashi aser tamakok alur, nisung shiai pei metetba aser angazüka aliba shisatsü lemsateptsüla, lokti mapa tajung asoshibo pei akaba rongsen aser nübu mulungsoa tenlatsüla", ta ashi.

Kaketshirji tarutsü nükla asünung, "kaketshirtemi taküm, shisatsü aser sempet ajak agi bendanga agüja alima nung shisa tajungtemji ngutettsü nükjidong ayutsüla", ta paisa ayongzük. Ajak dak alia, "nubur rongnung temeimtep lira

memeteti tashi tait telungjem tajung den terenlokjia adoktsü", ta paisa shisem.

Iba sentong nung taoba PHED minister Dr. Ngangshi K Aoia mapang tatsüka agia bejongmungertem ayongzüka liasü. Iba sentong nung Ungma, Chuchuyimpang, Khensa yim, Longmisa Senso Telungjem Mokokchung, ENPO Mokokchung Unit, Sumi Union Mokokchung, Mokokchung town kübok ward balala nungi lenirtem, anükabang, tembatinu aser sensosanger aika arua longso tepa munga liasü.

OFFICE OF THE DISTRICT PENSIONERS' ASSOCIATION

CO-OPERATIVE SOCIETY LTD
MOKOKCHUNG: NAGALAND REGD. NO NL0743

METETDAKTSÜR

Pensioner shibasa iba society nung share alia ali, 8th May 2017 anogo 10:00 am nung pensioner office day care centre, below post office nung meeting alitsü, iba anogo nung share certificate bener arutsü metetdaksür.

Sd/-
Mapulemba
Chairman/8131861004

Sd/-
I.Lepshi Jamir
Secretary

SANGDONGER

Medem Zünga (Ungma) Mokokchung Town Moatsümong 3rd May 2017 anogo 10:00 am nungi tenzüka Mr & Mrs. Imkongwati Longkümer, Arkong Ward-er kidang amongtsü. Anungji zünga süngsem ajak medema arutsü metetdaksür. Iba benjung nung Soyimsanger tantsü tambui anir anükapang ajak arua adentsü pelashishia jaoker. Zünger tenüng nung,

I.Chungshi Longkümer
Secretary, Medem Zünga Ungma, Mkg

PELABA SANGDONGER

Mangmetong Imchen Kidong Planning Committee ajanga, dated 27th to 28th April 2017 Aoli Imchen Kidong Hon Jubilee Mangmetong yimtsüung nung amongdang kija, kibong aser lokti balala shirnokisa nübu, rongsen aser shisatsü agi yaritepogo, nenok teyari ajanga Tsüngrem temoatsü nung mungdang takok ngua tembangtet nung, Ni Mangmetong Imchen Kidong Planning Committee ajanga nenok ajak dang pelaba lemsateper.

Sd/-
Longrimendang Imchen
Convenor, Planning Committee
Mangmetong

Sd/-
Jenti Imchen
Secretary, Planning Committee
Mangmetong

JKM senden ayonger

Dimapur, May 1 (TYO): 2017, Dimapur nung akatsü. Anungji May 5 anepdang 11:00 ako iba senden nung züngsem ajak medema arua adentsü asoshi Kaketshir Mungdang (JKM) JKM Tir, Merang Ozükum sanen luden aser ajanga sangdong ka nung ketedangpurtem senden ka metetdaksü.

Kohima nung Oorja-CAPF U-19 asayamung tenzükogo



May 01, 2017 nü Kohima Local Ground nung Oorja - CAPF U-19 Football Talent Hunt Asayamung lapokba sentong nung Home Minister Y Patton, IGAR(N) Sanjay Gupta aser tangartem mena lia tangokba noksa nung angur.

Kohima, May 01 (TYO) : Oorja asayamung ya Ato Nagaland State League "Oorja - Central Armed Police Force (Oorja-CAPF) U-19 football Talent Hunt Asayamung 9 Assam Rifles temi Head Quarters IGAR (North) kübok tanü nungi ayonga asayadar.

Iba asayamung nung school aser saisapong reju balala nungi tajemba agi telok 18-i -- tetsür team ti aser tebur team ti -- shilem agitsü.

Iba asayamung ya Nagaland Home Minister, Y Patton-i IGAR(N) Maj. Gen. Sanjay Gupta lia lapoktsü.

Sentong nung jembiba mapang Home Minister-i,

nunger lanurtem parnok rongnung shimokba (recruit) atema tenüngsang agütsür, ta pai shisem.

PRO IGAR(N) Amitabh Sharma-i, teburtem asayaji Kohima local ground nung aser tetsürtem IG Stadium nung asayatsü, ajsüaka tetsür aser tebur naprong final asayatembo May 8, 2017 nü Kohima local ground nung asayatsü, ta metetdaksü.

Iba asayamung nung asayar tetsür aser tebur telemsa shia nungi parnok nisung metsütsü (20 each) shimteter Shillong nung oa State tenüng nung asayatsü aser yangji ano New Delhi nung North East tenüng nung oa asayatsü asoshi shimtetsü, ta paisa metetdaksü.

Mezüngnü asaya osang- TEBURTEM (KOHIMA LOCAL GROUND):

1. State Boys Hostel-i 6-0 agi Kendriya Vidhyalaya (KV) Kohima akok
2. Christ King HSS aser KV Dimapur na 2-2 agi draw asü
3. State Sports Academy-i 12-0 agi KV Rangapahar akok

TETSÜRTEM (IG STADIUM)

1. Christ King HSS-i 3-0 agi KV Dimapur akok
2. Young Girls Club-i 2-0 agi Soccer Damsels akok
3. Sweet Poison Club IG Academy-i 7-0 agi Bayavü Hill High School, Kohima akok

IPL 2017:Mumbai Indians-i wickets 5 agi Bangalore akok



Bangalore, May 01, 2017 : RCB den asayaba mapang Rohit Sharma-i ball ka azükba noksa nung angur. Pai iba asaya nung 56 (not out) azükba ajanga Mumbai Indians-i takok angur.

Bangalore, May 01 (Agencies) : Indian Premier League asayamung nung asaya 38buba Royal Challengers Bangalore (RCB) aser Mumbai Indians telok na asayaa liasü aser iba asaya nung RCB mezüng bat asüba mapang asaya tatem tsütsü par telok nungi Pawan Negi kanga aritepa 6 aser 4 runs azük ajsüaka iba jagi par telok takok anguba nung meyari.

Hombarnü 10buba IPL Wankhede Stadium nung asayadang Mumbai Indians-i Royal Challengers Bangalore madak wicket pungu agi takok angur.

ajanga parnok jenjang tera junga aküm ajsüaka MI nungi captain Rohit Sharma-i runs 56 yanglua iba asaya takok angur aser iba takok ajanga parnok points 16 küma ano maneni temaba jenjang nungi masetshii lir.

RCB-bo tang tashi nung points 5 ang nguteta jenjang tenet buba nung lua lir.

Iba asaya nung Kohli-i ball 14 nungi runs 20 yanglutet.

MI teloki 162 ajatetsü arishia asayaba mapang Parthiv Patel mezüng ball nung out asü.

Iba sülen Nitish Rana aser Jos Buttler nati MI telok asaya ajungketja tena senteper runs 61 yanglu. RCB nungi Negi-i Buttler runs 33 nung out sütsü. Iba sülen tanga over ka nung ano paisa Rana runs 27 yanglu lia out sütsü. Wicket yamaji atonga tuguaka MI captain Rohit Sharma-i kanga süngjema runs yanglu. Pai Choudhary-i aonba over nung 4 runs ana atonga azük aser Sreenath Arvind-i aonba mapang 6 runs ka azük. Ibaji ajanga parnoki akoktsü atema tesüsa ball trok nungi runs 7 ang nungdaka aküm. Iba asaya nung ball ka aontsü anünga lia MI captain-i 4 runs ka azükba ajanga 165/5 (19.5) yangluteta tanü iba takok angur.



MAY 02, 2018 ASAYA

Delhi VS Hyderabad - 8:00 PM

APRIL 30, 2017 ASAYA OSANG

Mumbai-i wickets 5 agi Bangalore akok
Pune-i Gujarat akoktsü runs 77 nungdaker

CTN nung Penalty Shootout asayamung kaogo



CHANGTONGYA, MAY

01, 2017: Antsützübo Ward Youth Union-i ayongba One Day Penalty Shootout Asayamung May 01, 2017 anogo Public Ground, Changtongya Town nung takok ngua asaya liasü. Iba asayamung nung shilem agitsü asoshi Mokochung Town shir Merangkong tashi nungi telok 32 adenshia liasü. Telok ajaki kanga meranga asayar külen tatem nung Sunrise Youth Union, Changtongya Town aser Seven Friends, Chuchuyimlang

na asayaba nung takoker Sunrise Youth Union liasü.

Iba sentong nung Tongti Tesemdanger Wb. Rongsenwati liasü. Pai ashiba agi taoba mapang iba playground ya Revival Milak jangrudak tesem ka liasü aser iba den külemi iba moapu nung asaya inteter aika State level aser National Level tashi nung saisapong balala nung asayaba otsü lir. Anungji, iba asaya moapu nung asayadang iba temoatsü meshitsü asayartem dang ayongzüka liasü.

India nunger TT Soumyajit-i kija aser tarep naprong akok

Santiago, May 01 (Agencies)

: India nunger Table Tennis asayar mongin Soumyajit Ghosh-i ITTF Challenge Chile Open kija final asaya nung India nungersa, Anthony Amalraj koka iba asayamung indang takok marok benogo. Iba den külemi ano tarep asaya nunga pai Amalraj dena sür asayaba nung takok marok angur.

Deobarnü asaya nung


Somyajit-i 4-2 (8-11, 13-11, 11-6, 11-9, 4-11, 11-7) agi Amalraj madak takok angur.

Iba asayamung nung pai akokba ya dena India nunger tasembubai takok angur asütsü.

Tarep final asaya nung Soumyajit aser Amalraj na senteper Bulgaria nungi Philipp Floritz aser Romania nungi Hunor Szocs na madak 4-0 (13-11, 10-12, 14-12, 11-9) agi takok angur

Yimlibilema,
ne temesen anepaluang

LIVSAV[®] DS
Syrup/Capsule



Mfg. by: Medifun Research Health Products Pvt. Ltd. Thane (Maharashtra).
CUSTOMER CARE:- 022-6540183

BIEMDANGANG

"Temulung nung tako melii tangar yaribaji na asoshi temoatsü tulutiba asütsü."